

Atzinnos de sa bidida

Nughedu Santa Itria, lassada sa superstrada e mesches a 16 Km de longària, si lompet pigande s'istrada provintziale n.15. Sa bidida si incarat azumai totu subra su lagu Omodeo e at postu sas raighinas in su montigu, in mesu de unu sartu de crecos, crichizone e malesa postos a cracu. Zughet a palas suas su **monte de Santa Itria**, dae ue pigat sa segunda parte de su nùmene; sa prima invetzes, derivat dae "nughe", cheret nàrrere "noce" in italianu pro inditare chi custu sartu , una borta, fuat irricu de matas de nughe. Su monte Santa Itria si arbulat cun imponèntzia, essende unu trastu de profetu in su paesazu e faghende a biere bisuras Naturales e sena manu peruna de s'òmine, istichidos intre sas orrocas granìticas chi faghent de mere in totu s'ambiente.

Sa presèntzia de arrastos prenuràgicos e nuràgicos est zada dae sas "**Domus de Janas**" de "S'angrone" e "Arzolas de Goi" ue si podent mirare sas isculturas de sa conca de su trau chi inditat sa conca de su Deus òmine, adoradu dae sa zente de su neolìticu chi interraiat sos mortos issoro in custas precas tocadas dae s'òmine. In su Medioevu sa bidida faghiat parte de sa Curadoria de parte Barigadu, numenadu in su Cundaghe de Santa Maria de Bonacatu. Partetzipesit a sas chi podiant èssere sas premissas de sa paghe de s'annu 1388 e, a pustis de sa orruta de su giudicadu de Arborea fetzesit parte de su Marchesadu de Aristanis.

In su tzentru abitadu de Nughedu Santa Itria si podet mirare sa **crèsia parrochiale** de su XVI sèculu, in istile gòtico-aragonese, dedicada a **Santu Jacu Apòstulu** cun su chirru de (n)antis in trachite rosa cun unu rosone mannu. A chirru de intro de sa crèsia ddue at arcos a sestu agudu, unu altare de linna, fonte de batiare e abbasantera totus de meda valore chi sunt irrichidos dae isculturas chi rapresentant concas de ànzelos, comente fintzas in sa fatzada. Su valore de sa parrochiale est dadu dae s'arte, ma s'in prus dae s'àera chi ddu at a intro e **chi conduit su visitatore a s'orazione...** Semper a intro de su tzentru abitadu, de valore mannu est sa ex domo parrochiale de su 1500, una domo aragonese e àteros **portales** chi, mancari su colare de sos annos, aguantant a s'abba, a su nie e a su bentu e testimonzant s'istòria de sa bidida. Acanta , digna de importu est sa **crèsia** in su sartu dedicada a **Santu Asile Magnu**, chi si riferit a su de XV sèculu, irrichida dae unu loza e colonnas e dae una corte inghiriada dae sos "**Muristenes**". Su valore de s'ambiente de su Monte Santa Itria est mannu fintzas pro ite est dominadu dae **crastos granìticos** chi pigant s'ampramanu ispantosos, intre su padente amenu postu a cracu, chi pigant formas istrambecas e colant in mesu de montigos dae "Intrecrastos" fintzas a "Artolochele".

Sos cùcuros de sos montes, sas puntas de sos crastos de formas diferentes, baddes, mitzas, **rojas chi zughent fùria** e vegetazione manna faghent de custa localidade una **de sas prus galanas de sa Sardinna**.

In sa zona mutida "Alamoju", semper a intro de su monte, naschit su museu avifaunìticu chi presentat carchi aposentu mudadu cun arratzas diferentes de fàuna presente in su territòriu sardu, cun puzones predadores comente s'**àbila** reale chi faghet su niu a "S'Iscale de Su Crecu", **istores**, **tzapajos** e àteros ancora comente **crebos**, **lèperes**, **dàinos** e **sirbones**.

(Traduzione in sardu de su testu "Cenni" de s' Home page)